

國子監志

國子監志卷五十八

金石志六

高宗純皇帝

御製說經文石刻

書春秋元年春王正月事

春秋。聖人尊王之經也。元年春王正月。開宗明義之  
第一也。解此者。自三傳以至後儒。其說充棟。或致操  
戈。無容置議。然識聖人之深意者。有幾乎王道熄而  
作春秋。春秋。魯之舊史也。自隱公始。則不得不書隱

公元年而即繼之曰春王正月前史所無有也蓋言公之元年乃稟王之春王之正而得是非尊王之義乎且是年也於齊為九年於晉為二年衛鄭以下各為其年不可僂指數而總為平王之四十九年於斯時也世人將何以紀其年而知其歲乎是則聖人之書元年春王正月也者其亦有感於斯乎行夏之時聖人之私議不能行於時言春王而不言王春月可改而春不可改亦隱寓夏之時與王之元所謂大一統足以一天下之心而不可任其紛有不能行之歎

矣。茲為開宗始義。乃貫春秋之本末。而絕筆於獲麟。蓋聖人之道在萬世。即聖人之憂在萬世。然則封建之說。不惟不可行於後世。知聖人亦未必以為宜然也。

書洪咨夔春秋說論隱公作偽事

春秋以三傳為近古。後世注疏家愈遠愈奇。而愈不得其正。即如不書隱公即位。左氏謂攝。蓋引而不發。似矣。公羊以為桓貴。則已失之。惟穀梁一則謂成公志。再則謂成人美。終則謂輕千乘之國。蹈道則未持。

論平正而不苛。然三傳即能得聖人筆削之精義耶。吾不敢信。而後世操同室之戈。炫獨出之見。求勝人而反昧己。比比是也。如洪咨夔春秋說之論隱公直以為作偽。日拙求實已甚焉。其言蓋出於盧仝春秋摘微之緒論。夫仝去三傳幾千百年。而咨夔又去仝幾四百餘年。拾人唾餘。而以為自出。已見此何能欺千載之公論乎。謂之為責賢者備。猶屬左袒耳。

菟苗獮狩說

傳稱春菟夏苗。秋獮冬狩。各具時義。言固引而未發。

至所稱皆於農隙以講事。吾不能無疑焉。夫秋冬或有農隙。至於春夏則自播種以至刈穫。其間耘耨澆漑。較晴量雨。炙背胝足。苦哉耕夫。蓋無一時之安心息力。而謂之有農隙可乎。常思菑苗从草。獮狩从犬。古人制字。蓋有深意。杜注。苗為菑。除害是矣。而所云菑索。擇取不孕者。猶未免以辭害義。夫禽獸固族聚而類處。使擇壯而驚其牝。則孕者不能無傷。豈育物之仁哉。則所為菑索者。亦以菑索其害苗為當。至於獮狩。皆從犬。則誠守而取之。順殺氣而獮之。是則春

夏之取獸繫乎田。秋冬之取獸繫乎獸。其義明矣。雖然更有說焉。古時地廣人稀。故田或游獸而有蒐苗之事。以除其害。今自腹裏以及邊壤地無不耕。安得有禽獸害苗之事乎。若夫園場之地。原自不耕。則所為蒐索其不孕而肥者。與夫初生如苗者。以嘗新。繹其義亦未嘗不通。而實非古人所解者矣。

三傳晉假道伐虢辨

三傳為素王輔臣。而各有失。若夫誌晉假道伐虢之事。則更同一失。而且相矛盾。此不可以不辨也。左氏

稱晉假道滅虢。在僖公五年冬。師還。館于虞。遂襲虞。滅之。公羊穀梁。則均在僖公二年。而高之言。則曰還四年。反取虞。赤之言。則曰獻公亡虢五年。而後舉虞。雖楊士勛疏曰。謂僖五年。此蓋遷就欲合左氏之意。然以荀息借道之言證之。又當先五年。亦不合。宮之奇諫之日也。異哉。文人之紀事。豔者務其富。清者欲其婉。辨者圖其裁。而不論理之從違。蹟之真偽。以致失之誣。失之短。失之俗。雖前人已。有定論。而後之踵事增華者。其才識已不如三氏。重加之以阿好而毀。



惡則其事之可信與否又當何如哉若夫假道之事又可略言矣蓋所謂道者經由之路也晉在北而虢在南虞在其間晉欲滅虢假道於虞似矣然左氏稱宮之奇之言則曰虢虞之表公穀則皆曰脣亡則齒寒夫虢旣在虞南則虞實表與脣非所謂虢也使虞虢疆相並而界相連如公羊所稱欲攻虢則虞救之攻虞則虢救之今破其相救之策權和一以攻一則可更不可言假道矣且以幣假道是有求於人有求於人者聽與否固未可定虞公雖至愚豈其貪璧馬

而受亡國之憂哉。以予觀之。晉即不假道。其亡虢之後。亦必將破虞。不繫道之假與不假也。則三傳之煩辭。皆不必信。而惟信經之二年。虞師晉師滅夏陽。五年。晉人執虞公。斯可。

### 風馬牛說

齊桓伐楚。楚子使與師言。唯是風馬牛不相及。孔穎達正義注。以為風。放也。牝牡相誘。謂之風。嗟夫。是何言耶。直以淫俗語誣經傳。且於齊楚之遠。不相及何涉。更引尚書以為證。其去益遠。蓋乾為馬。馬性剛。坤

為牛牛性柔馬性剛故其立與馳悉逆風牛性柔故其立與馳悉順風一迎風一順風是不相及也注疏家本不曾習見馬牛之性不得其辭遂引尚書馬牛風逸為之說而不知其逸正所謂迎風順風之不相及也偶閱左傳故申其說如是及博閱諸書見宋俞炎席上腐談頗於予意有相合故並載之

俞炎席上腐談曰牛順物乘順風而行則順馬健物逆逆風而行則健書費誓云馬牛其風春秋左氏傳云風馬牛不相及蓋馬牛奔逸則各自從風

而行也。

讀左傳晉楚城濮之戰說

城濮之戰。人皆知子玉之傲。而憤以致敗。晉臣之巧。而和以致勝。予則以為其過不在子玉。而在楚子也。夫戰。國之大事也。臣不聽君言。冒徼幸。願以閒執讒。慝之口。而君即從之一失也。知其不可。而少與之師。以觀其敗。二失也。馬且必乘其產。乃以陳蔡屬之右師。驚虎皮而先奔。三失也。有此三失。即楚子以全軍臨師。亦必致敗。而況君臣之心。先自攜貳。謬任其敗。

以實已言而棄西廣東宮及若敖之六卒與敵而弗  
惜是非以怨一臣而波及自喪其衆軍士之命乎且  
明知晉侯備嘗險阻天之所置允當應歸矣何不令  
子玉全師而旋雖將在外君命有所不受亦視其得  
失之大小如何耳未有明知其失顧以強臣一言而  
怒姑由其戰置國勢之興衰人命之存亡於不計如  
越人視秦人之肥瘠豈理也哉予故曰其過不在子  
玉而在楚子也

讀左傳季文子出莒僕

季文子出莒僕是也。而左氏有過辭。然魯之襄仲獨  
非僕之類乎。其事即接宣公之立。不聞文子有討賊  
之誅。何獨嚴於僕而恕於仲乎。且僂數元愷四凶。謂  
堯不能舉賢而舜舉之。堯不能去惡而舜去之。審如  
是。則堯何以為巍巍蕩蕩。則天之大聖乎。蓋其賢其  
惡。或者當堯之時。尚未甚彰。而其舉其去。亦因之而  
有所待。千載之下。豈可輕議哉。况舜之協帝。皆出堯  
之所授。則舜之所舉。即堯之所舉。舜之所去。即堯之  
所去耳。邱明博於紀事。但逞其文藻。而昧於知理。讀

其文者斥其浮誇資其強識而於是非去取之閒斷之以理可也

納污含垢論

昔路溫舒引左氏之言曰川澤納污國君含垢此不過因上尚德緩刑之疏言之於納污含垢之義語焉而未詳即左氏亦不過申伯宗令晉君待時之意其於納污含垢本義亦未涉其藩籬弗啻引而未發也夫川澤非地乎山藪亦地也藏疾疾非污乎國君含垢溫舒作詬乃假借用之而垢與詬亦皆污也胥應

以納污為重。蓋乾為父。坤為母。父天。母地。萬物皆然。父兮生我。母兮鞠我。鞠者養也。試思人之初生。以至離襁褓。其五濁穢溷。皆遺母之身。母不以為污。又安有納其污之念乎。大地之視萬物為赤子。亦何異於此哉。必知之。然後知與天地為一氣。而混然中處之。身。同胞吾與之懷。不落空虛之境。當思有以盡其分量也。夫如是。則容正人。受直言。乃其餘事。吾謂溫舒未必見及此耳。北郊齋居。悚然有見於此。遂命筆書之。



書宋劉清之記左傳叔向母之事

叔向之母賢母也能訓其子為正人又能知叔虎之

母美而惡入聲將生敗子惡去聲之而不使見羊舌職劉

清之記此事而所注又不明幾不成句令人不可曉

宋劉清之撰戒于通錄記叔向母一事引左傳云晉叔向之母妒叔虎之母美而不使其子皆諫其母母

曰深山大澤實生龍蛇彼美余懼其生龍蛇以禍汝汝敵族也余何愛焉使往視寢生叔虎美而有勇樂

盈嬖之故羊舌氏之族及於難云云所注殊不明晰按左傳注不使謂不使見叔向之父羊舌職也又左

傳汝敵族也下有國多大寵不仁人間之不亦難乎三語為劉清之刪去前後文義幾至不可讀亦著迷

過者也然此誤不在劉清之而在左邱明夫妒婦人之

惡德也。叔向之母。蓋能預見叔虎之母。雖美而惡。將生惡子。以敝羊舌氏之宗。然從子之諫。使往視職之寢。果生虎。而羊舌氏之族。遂及於難。是誠仁人能惡人。而有先見之明者矣。左氏應謂之惡。去聲而不宜謂之妒。是誠其浮夸而不實也。以致千載之下。謂叔向之母果妒焉。余不可不正其誣。

書晏嬰叔向論齊晉事

晏嬰叔向。齊晉之賢大夫也。其論齊晉為季世。將不延厥祚。而為異姓所有。如燭照數計。而龜卜後之。讀

是篇者無不以為避而吾獨以為非非其論之不  
中去聲而正論其論之中為不避也夫齊之將移陳氏  
晉之將分三家兩國之存亡繫焉君棄其民以樂怡  
憂是自取其亡也大夫者與國同存亡者也不知者  
愚不足誅既知之矣不亟諫其君思所以防患存國  
是不忠也諫而不從死其職為上辭其職為次二子  
不聞有此也徒如越人視秦人之肥瘠且私議其君  
國大事於異國之大夫是可謂之與國同休戚之人  
乎子為父隱臣不當為君隱乎有識之人將鄙之二

子自居為有識者乎。無識者乎。故吾獨以其論為非。亦責賢者備之意云爾。夫叔向之言。獨重於其私宗。而晏嬰所謂陳氏以家量貸。而以公量收之。雖市惠之意耶。實亦難為繼也。世之好名者。固不無市惠之心。然亦必量入為出。為其可繼。陳氏以私恩小惠。籠絡人心。容有其事。若必如左氏所云。齊舊四量。陳氏三量。皆登一焉。按杜預注。陸德明音義。斛公量。豆四升。四豆為區。一斗六升。四區為釜。六斗四升。釜十為鍾。六斛四斗。家量登一。豆五升。積至於鍾。為八斛。則多一斛六斗。是家量較公量加十分之二。以家量貸。而以公量收之。則貸者如鷲。入不償出。勢必難繼。陳氏先自貧矣。是左氏欲藻飾其詞。而不知其出於情理之外。浮夸之說。有由來也。且嬰向私議。誰則聞之。此或出於左氏品藻浮誇之

為是則嬰向之語並不能不疑為邱明之變言或非實出於嬰向者矣

讀公羊

公羊於隱公之何以不言即位也曰成公意也既又申其義曰立嫡以長不以賢立子以貴不以長夫成公意是矣而以長不以賢以貴不以長之說實甚謬蓋以貴不以長或者祛諸孽覲覲之心猶託於各安其分之義至於以長不以賢則均貴也均貴則擇賢棄不肖有何不可而亦必為之防微杜漸曰以長不

以賢乎。且啓賢而賤。卒貴而不肖。立卒而商以亡。是非萬世之炯鑒乎。余以為棄卒之貴而立啓之賤。猶不至於屋商之社。夫商之宗祀不絕。與棄貴而立賤。其是非輕重。必有能辨之者。知此則公羊之說之謬。不亦章章明甚哉。而劉頌引其言。以為事情之不可易者。識見庸愚。固不屑再闢矣。且以天下與人易。為天下得人難。堯舜禹傳賢傳子之事。韓愈論之詳矣。夫與賢之說。後世固不可行。顧於諸子中。獨不可擇賢而與之。必拘於以長以貴之小節。而不為天下萬

民擇賢君而立之是直以祖宗社稷為輕而以已妻媵娣為重千金之家有所不可而况天下萬民之大乎或曰後世嬖幸妾而立少子以致敗國亡家者亦有之矣不若守公羊之言為無患雖然嬖幸而立少子未必有其一二不擇賢而守分將十必居其十審是言則公羊之說為宜從乎為不宜從乎

讀公羊

余讀公羊至許世子止之事不禁廢書而歎曰嗟乎迂儒失聖人之旨逞強辭之奪而後世方稱其鼎足

邱明獨能傳說不亦師心刺謬乎。夫許世子之事。左傳隱躍其言。而穀梁則不過曰。即止自責而責之而已耳。至夫子高則直引樂正子春之事以證之一則曰聽止也。再則曰赦止也。且人子之視疾。或一藥而愈。或數藥而愈。或數藥而竟不愈。或一藥而竟不愈者有之矣。即子春之親。豈能常存於世。其非進藥而不愈者乎。則是千萬世之人。盡不能免止之罪。抑亦盡將得止之赦也。夫逆天之誅。聖人何忍慢以罪人。而又慢以赦人也。止之進藥。必有不敬誤投之咎。非



奮不盡不嘗而已。然其心終無他故。其罪止於是。而蘇轍胡寅之流。方且祖其說。演義游辭。失之愈遠矣。道之以德。齊之以禮。有恥且格。

政刑者。德禮之先聲。德禮者。政刑之大本。舍德禮而求政刑。必成雜霸之治。即政刑而寓德禮。乃見純王之心。一而二。二而一者也。若云德禮之外。別有所謂政刑。則非聖人垂教之本意矣。

視其所以。觀其所由。察其所安。人焉廋哉。人焉廋哉。所以。所由。所安。雖在人。曰視。曰觀。曰察。則在己。必也。

如衡如石而物之懸者自呈其輕重如水如鏡而物之照者自露其妍媸故聖人教人無非自盡其力而更要在不存成見不然萬理紛前一指或蔽其為以為由為安且不能辨又安能致視致觀致察以期人之不廋哉雖然知人則哲惟帝其難是以聖人再三丁寧而不厭其詳者抑亦有懼於聽言觀行矣

子謂韶盡美矣又盡善也謂武盡美矣未盡善也不圖為樂之義已具前篇茲更以夫子之論舜武以申夫子之聞韶庶乎其有合於聖人之言樂乎夫樂

者何律聲言志而已無志則無言無言則無聲無聲必無律依與永則行乎其閒而不具體者也是則樂之本在乎志知在乎志則知舜之盡美善而武之未盡善矣何必費辭蓋舜性之者也武反之者也舜之勅命時幾何如其盡美盡善武之度德度義亦盡美矣謂盡善可乎若以聲容節奏論舜武之樂則武去夫子之時已遠而舜更遠矣其聲容節奏必有所失且徒究聲律而舍志與言非知樂者故予謂韶樂至今存以舜廢歌之言證之然則武之未盡善將何以

證之曰。雅之下武。頌之耆定。是其盡美者也。至於未盡善者。則夫子反魯定三百之時。或者有所刪乎。子故申其說如此。而要以舍志與言。無宮商而泥謂有聲無詩乎。定乎其非知樂者矣。

仁者安仁。知者利仁。

安仁利仁。朱子解之。謂安其仁。利於仁。蓋引而未發也。雙峯饒氏謂與仁一。故曰其仁。其者。謂已也。與仁猶二。故曰於仁。於者。有間也。亦即發之矣。然曷不於顏淵子貢觀之乎。子以為顏淵安仁。子貢利仁。簞食

瓢飲回不改其樂是安仁也。賜不受命而貨殖焉是利仁也。回之安仁易知而難行。茲不贅論。若夫賜之不受命非富貴貧賤之命也。蓋天命之謂性。率性之謂道。率性即安仁也。不受命即未能安仁也。貨殖者見有利於仁如貨殖之生財耳。若謂子貢為貨殖生財之倫則孟子尚不言利而謂孔子以是論賜且與回相提並較乎。史記直以子貢為好廢舉轉貨貨是誠牟利之為甚矣。其不知孔門之道矣。程子以為子貢之貨殖非豐財然亦少時事。至聞性與天道則不

為矣。然未明言子貢之貨殖為利於仁。葉氏則云。或者不喻。乃謂子貢真好利。而亦未明言子貢之利於仁。是二子之論。胥為近之。而於子貢之利仁。尚有未達一閒者。茲故申而明之。

惟仁者能好人能惡人

仁者之能好人。夫人而知之矣。至於仁者之能惡人。則人或未之知也。是以聖人以之訓人焉。夫有情之人。孰無好惡。然率好惡之良。雖愚夫愚婦。亦有得其正而極好惡之量。即大賢大智。鮮能復其初。故好人

而非淪於徇物之私惡人而非同於嫉世之偏是之  
謂能好能惡子夏之歎夫子曰富哉言乎舜有天下  
選於衆舉臯陶不仁者遠矣湯有天下選於衆舉伊  
尹不仁者遠矣可見仁者之能好能惡雖樊遲之賢  
尚有未窺其領要者世之人但以得衆容物為盡仁  
之量者其見豈不淺哉

君子之於天下也無適也無莫也義之與比  
聖人勉人以順應天下之理故先示人以大公無我  
之心蓋人必有所不為而後可以有為然此以言其

立志而非謂其於制天下之事也。於制天下之事。而預存一必為必不為之心。則非大公無我之道。失義之宜矣。如衡如石。不定物以數。物之懸者輕重自呈。如水如鏡。不示物以形。物之鑑者妍媸畢露。內聖外王之學。莫不以是為要。而有臨民之責者。舍此更無以為出治之本。此執中之傳。所以為千古帝王之師範也。

無適也。無莫也。義之與比。

此孔子訓君子以應天下之事。而有天下之責者。尤



當拳拳服膺不執一己之見惟以義為權衡而弗失也孔子嘗云無可無不可而此云無適無莫者何蓋孔子聖之時從心不踰發皆中節以言乎仕止久速猶其小焉者若夫君子之於天下其晰理或未純精義或未當而亦欲信心應變則謝氏所謂猖狂自恣矣故主於必為則是適宋神宗之於王安石是也主於必不為則是莫漢惠帝之於曹參是也雖清淨之略勝滋擾然其不比於義而有所偏則一也吾故曰有天下之責者尤當拳拳服膺不執一己之見惟以

義為權衡而弗失也

夫子之道忠恕而已矣

一貫不外於忠恕而實則忠恕即一貫而已蓋一貫  
即所云如有所立卓爾雖欲從之末由也已此其道  
無端倪之可見而非不可見也於忠恕見之天何言  
哉四時行焉百物生焉天地不可見也於四時之行  
百物之生見之謂四時百物非天地可乎謂天地將  
借四時百物以見可乎忠恕之於一貫亦如是而已  
矣形而上者謂之道天地是也一貫是也形而下者

謂之器四時百物是也。忠恕是也。夫聖人又何嘗有告曾子之別傳。而曾子乃假借是語以泛應門人之問哉。

回也聞一以知十。賜也聞一以知二。

朱子注此。以為一與十數之終始。一與二數之相對。回與賜之高下。以是而定。夫既云數矣。則自一而數至十。回將何以歷知。以至十哉。即二為一之對。則所謂始終正相對之二也。且善惡高下是非賓主之類。其相對者。不可屈指數。是賜亦可稱盡知。且與回同。

矣。子以為十者。上下八方也。其數既合。其理亦備。是  
回之知。舉一而無不知也。夫子示曾子。吾道一以貫  
之。正謂此也。謂回為即始而見終。則尚有見者存焉。  
蓋一以貫之。無所為知。而無不知。正可謂聞一知十  
之證。是賜之聞一知二。則實自用其知。推測存焉。此  
夫子之所以與其弗如回也。若以朱注視之。則其所  
知。亦不過賜之流而已。其去一貫之道遠矣。未必似  
曾子之能聞諸夫子也。

仁者先難而後獲

問仁於孔子者多矣。而所對各有不同。然聖門以顏淵為高弟。孔子所對者。則曰克己復禮。以是知克己復禮實為仁之最切最要。即所對樊遲者。亦豈外於是哉。蓋先難者何。克己也。後獲者何。復禮也。夫難莫難於克己。仁者天理也。私欲介於中。其能存天理者鮮矣。故易曰。大師克相遇。必用大師之力。而後能克其私欲。以全天理。故易又曰。顏氏之子。其殆庶幾乎。有不善。未嘗不知。知之未嘗復行。不遠復。无祇悔。元吉。皆克己復禮之為也。董仲舒正誼明道之論。略為

近之。而朱子舉以為不求後效。又以為警樊遲有先獲之病。未嘗申明告顏子之意。余故敘而論之。知者樂仁者壽。

仁者知之體。知者仁之用。亦如山者水之體。水者山之用。故無水之山必枯。無山之水必泄。知而離仁失之巧。仁而離知失之訥。朱子解此章。雖云不是兼仁知而言。而夫子之言。實並仁知之形容。及與其效相提並論。以顯其相資。殷而相得彰也。明乎仁知之相資。則體用各得其宜。蓋知有知之體用。仁有仁之體

用而仁知又互相為體用渾然天理動靜周流其樂與壽不求而必得矣雖然其樂與壽豈一己之私哉知者無不通樂何如之仁者無不善壽何如之夫然則其樂其壽實泯彼此該物我樂以天下壽以萬世學者宜無不加勉而為人君者更當以是為亟也

夢辨

幼讀論語至孔子曰吾不復夢見周公解之者咸以為孔子盛時曾夢見周公老而衰則無復是夢未嘗不疑之然不得其說則亦置之今老矣於學於理頗

有所進。不忍置此疑而不明。作夢辨。

夫夢者。無何有之事也。真人不夢。尚矣。至誠之道。可  
以前知。如孔子兩柱之夢。非夢也。乃前知也。類乎是  
者。亦不一而足。吾悉以前知概之。若夫高宗版築之  
夢。吾固已疑之。而著論於通鑑。闡要之書。蓋二典三  
謨。無所謂夢之語。至周禮乃有占夢之官。而其說始  
紛。周禮非聖人所作也。以予論之。夢雖無何有。而總  
不出於思。思者。情之遠也。真人無夢。蓋不牽於思也。  
然思有有涉者。有無涉者。無涉者。若飛而行。水而履。



火之侵崖之墮獸來噬鬼來擾龜之毛兔之角幽漠  
滯汨覺則皆無不可紀極此則畸夢而已豈實有哉  
其有涉者必有所宿識如父子親友之類設非宿識  
無夢之理見其祖者夢其祖至於高曾則不能夢也  
此則思由於心想其形然必宿識其形者耳若孔子  
之夢周公蓋由心想乎而吾以為必無之事亦在此  
耳夫堯睂八彩舜目重瞳禹耳三漏湯肩二肘是雖  
出於想像者言然尚有形之可擬也若夫周公之容  
為哲乎為黔乎其貌為妍乎為媿乎身之直為長為

短體之橫為肥為瘠。是均不可知其為何形。然則孔子何以夢之。蓋孔子自歎至老而終不能行周公之道。故曰不復夢見而已。不復夢見者。不能復行其道。是即衰而已。是即俗所謂非夢想所及而已。是即歎道之衰。而非歎身之衰而已。且身有盛衰。心豈有盛衰乎。凡人尚如是。而況聖人乎。若因身之衰而並道亦失之。非聖人之事也。楊簡撰易傳於无妄之九五。直引以為孔子實不復夢周公。此誠不值一喙。若倪瓚自詡其畫。以謂非王蒙所夢見。則尚近之。宋楊簡易傳於

无妄之九五以為孔子不夢周公此與膠柱之見何異內府云是實以孔子曾夢周公此與膠柱之見何異內府有倪瓚獅子林圖其自跋云與趙君善長以意商榷真傳別開遠意非王索所夢見此雖尋常習熟之詞却與論語不復夢見語意較為近之蓋謂非其所能即為非其所夢見也所謂孔子歎道之不能行亦如是而已矣即如言今之政治余以為不能夢見堯舜豈余曾夢見堯舜乎因並識之以俟明於夢者

子在齊聞韶三月不知肉味曰不圖為樂之至於斯也

咸池六英有其名而無其樂非無樂也無其言故不

傳其樂耳。若夫舜之韶則自垂千古。何以故。舜之言垂千古。則樂亦垂千古。夫子在齊偶聞之耳。必曰在齊始有韶。夫子聞之之後而韶遂絕。是豈知樂者哉。司馬遷增之以學之二字。朱子亦隨而注之。則胥未知樂。且未知夫子矣。蓋言志永言。依永和聲。舜固自言其韶矣。然此數語。徒舉其用而未紀其實。則又繼之以勅天之命之歌。皋陶颺言賡載。君臣交儆。是非樂乎。是非韶乎。是非夫子所以感其誠而歎其極。不知肉味者以此乎。且夫子天縱之聖。何學而不能而

必於韶也。學之以三月而後能乎。蓋三月為一季。第言其久耳。而朱子且申之以九十一日。知味之說。反覆論辯不已。吁。其去之益遠矣。然子以為夫子不圖為樂之語。亦有二義焉。至於斯者。至其極也。樂之感人為最深。而亦有善不善之殊。非樂之罪也。在於用之者之人耳。樂之善者。至其極。則惟時惟幾。君明臣良。世有不治。民有不被其澤者乎。樂之不善者。至其極。則紂之北里之歌。靡靡之舞。唐明皇之霓裳羽衣。世有不亂。民有不遭其荼毒者乎。此夫子垂訓後世。

之深意。所以有放鄭聲之言也。而注書家總未言及之。予故表而出之。

一日克己復禮。天下歸仁焉。

天地至廣也。民物至衆也。而一人一日之間。苟能克己復禮。天下歸仁焉。斯語也。聖人豈欺我哉。蓋天地民物。總不外我之一心。仁。人心也。惟不能存仁。其心已亡矣。是以視天地民物。自天地民物。而我自我。於歸仁乎何有。然其本性之善。固在也。一日克己復禮。其仁即在是。而天下之歸仁亦在是。故顏子三月不

達斯三月之閒即是天下歸仁而其餘之日月至其  
至之時天下之歸仁亦猶顏子之三月不違而已矣  
至於聖人位天地育萬物何一非此心之流行於宇  
宙閒而天地自位萬物自育乎是非以仁為感通之  
具也亦非舉為仁之效而斬人之求仁也人苟未能  
克己復禮則必卜度仁之能感通天下而以天下歸  
仁為為仁之效是心也即已也持此已而冀天下之  
歸仁是猶北轅而適越吾知其無至之日必矣  
百姓足君孰與不足

後儒解此章者。率以深言君民一體。什一天下之中。為言。而戒夫橫征暴斂。以虐民耳。夫橫征暴斂。自非大無道之君。與夫極孱弱之國。孰肯為之。彼其剗肉補瘡。胥淪於亡。有如哀公所云。二猶不足之歎耳。余則以為為人君者。當常存百姓不足而欲其足之心。而此心常不足也。蓋貴為天子。富有四海。豈有不足之理。但四海之內。百姓衆矣。其皆足乎。若但知己之足。而不知百姓之不足。視己之足。即以為百姓亦足。則是孤為君之職。背天理而失民心。必在此矣。然百



姓之足。豈易言哉。水旱之不齊。貧富之不等。非輕徭薄賦之所能及也。一人向隅。仁者有所不忍。而況向隅者衆乎。此余所以宵旰祈年。令各省無匿災傷。而亟為賑恤。緩貸補偏。救弊之為。夜以繼日。猶不足也。居之無倦。行之以忠。

居之無倦者。存誠之體。行之以忠者。致誠之事。此夫子因子張之問政。而告之以內聖外王之學也。蓋內聖外王之學。原無居與行之分。而違有心與事之歧。一誠而已。夫何間焉。自夫知誘物蔽。而亡其正。誠斯

泯矣。故居之心者。不能不怠。而行之事者。不能不偽。非特為政者作此而失恒。即為學者因此而喪良者多矣。故夫子因子張之問政而發明之。苟其居之心者。一朝乾夕惕之肫行之事者。一不欲勿施之孚誠斯立矣。政斯行矣。何嘗分誠與政為二事。又安用其以政而存諸心。以政而達諸事乎。

樊遲問仁。子曰愛人。問知。子曰知人。

問仁而曰愛人。問知而曰知人。此非啻示仁知之用。而且括仁知之體。嘗謂聖人之言。大小畢該。有如海。

焉以瓶取之盈瓶以罍取之盈罍無不滿其量故聖  
門問仁者雖多夫子各告之殊而無非為仁之極則  
也乃樊遲以知仁兼問夫子亦惟是直指其要曰愛  
人知人似乎隨所問而揭指歸於以明仁知有相成  
之用而已然仁知之全體大用無有過於此者大哉  
乾元萬物資始天地以生物為心也聖人得乾之元  
以為仁聖人之愛人即天地生物之心也舍生物之  
心不可見乾元之資始舍愛人又何能見聖人之仁  
哉愛人之為仁明則知人之為知可類推矣余故曰

非啻示仁知之用。而且括仁知之體。

子路問政。子曰。先之勞之。請益。曰。無倦。

昔敬姜之言曰。夫民勞則思。思則善心生。逸則淫。淫則忘善。忘善則惡心生。此正夫子勞之之意。夫教養二事。本是一事。既教之。則不能不勞之。無論木鐸之徇。庠序黨遂之設。節其性以六禮。興其德以七教。而彼蚩蚩之民。方且以為扞格而難行。即教之樹藝。課以耕桑。雨淋日炙中。老農執杖而督其子。曰。力為之。其子以為是苦我勞我者有之矣。而况官乎。此為政。

者勞民之難也。然而亦易者。則有先之之誠在。夫老農勞其子。而其子終不怨者。無他。以為其愛我教我。為我謀而勞我。而彼亦與我共此勞也。使為政者。以惻怛之心。行忠厚之政。以身先之。則雖勞其民。而民不以為勞。如子之從父焉。若云以身勞之。則自有以身先之之事在。此不可以不辨。

先之勞之。請益曰無倦。

夫子為子路言先之勞之者。以為有司親民者而發。而人君為政之道。亦實不外乎此。蓋君與臣其職不

同而為民為政則同。先之以孝弟。固君臣所應同者。至於循阡陌。勸農桑。乃臣之事。而非君所宜親者。然則君可以不勞乎。朝乾夕惕。宵衣旰食。又何以云乎。是則君有君之勞。臣有臣之勞。臣之勞。即所謂循行勸課。勞其身之事也。至於君之勞。則所為敬天勤民。勅幾求賢。先天下之憂而憂。其勞蓋有不可勝言者。而皆勞其心之事也。設厭其勞而圖逸。雖不乏一日之樂。而將貽百世之害。是則夫子一言。而具萬世君臣為政之大要。若夫無倦則益。申乾象天行不息之

義與公旦無逸之訓相發明非徒為子路好勇而戒其不能持久而已也

為君難跋

予昔為創業守成難易說亦既反覆辨論難與不易之輕重懸殊不可同日而語以為岑文本之言非是而定之曰開創不易守成難矣此非在守成言守成蓋實有見其難也茲特引伸觸類敬述勤政殿後楹皇考御書為君難之義而為之跋曰大哉

王言示大清億萬斯年

家法大訓歟。夫為君難之言。孔子道人之言耳。而吾直以為

皇考之言者何。蓋耕當問僕。織當問婢。豈不以習焉安焉。不見異物而遷之謂乎。且孔子非為君者也。其云難。亦不過思其理而度其勢。究未身歷其境而心親其勞也。

皇考稟內聖之姿。行外王之道。質諸心得。驗以躬行。故取孔子之言。而銘之。紹端所以自警也。所以訓予小子也。所以詔世世孫曾。常凜此志。



以迓

天庥而基命宥密永永無極也是故言政莫備於尚書  
而言難亦權輿於尚書放勲重華一再曰欽引而未  
發至於大禹祇承於帝首曰后克艱厥后艱者難也  
承於帝舜者舜實承於帝堯也惟帝其難之則益深  
切著明言之矣無輕民事惟艱伊尹之申誥也先知  
稼穡之艱難周公之作訓也五十八篇之中其於  
天命民畀之可畏暑雨祁寒之宜思誨之諄諄三致意  
焉甄古今之得失綜政典之治亂無知難而不興之

世亦無不知難而不亡之朝。然而知難非空言。知其難而已。其必勅命謹幾。明德修身。以立其本。懲忿窒欲。親賢遠佞。以正其施。凜凜焉。惴惴焉。以謹對越。而培永圖。予故曰大哉。

王言示大清億萬斯年

家法大訓也。或曰。為君難。為臣不易。孔子之言也。今獨舉其一。豈股肱交儆之義哉。予曰。向不云乎。難與不易。輕重懸殊。不可同日而語。則為臣之不易。吾將俟為臣者自言其不易可耳。未若為君之難也。且也當

其不易者恒多。語有之。衆擎易舉。則不易者亦將成。易而當其難者一人而已。嗚呼。豈不甚難。

子曰。古之學者為己。今之學者為人。

此聖人歎世道之衰微。而慨想古之人也。夫學者何。明明德以新民。而止於至善。惟行其心之所安。而盡其分之當為耳。豈有人己之分哉。自精一之學不傳。而人已乃判分。於是。不知而愠者有之。蓋不能克己也。故孔子矯之曰。汝以此為為己乎。古之學者。不蘄人知。而人無不知。此乃所以為己也。今之學者。惟蘄

人知。心逐於外而日喪。是為人耳。豈為己耶。究之古之學者。何曾有為己之心哉。夫有己必有人。人已之見介於中。天理之公於是泯矣。故古之學者。無人已之分。又豈有為己為人之別。聖人慨今之學者之不古若。於是有古之學者為己之歎耳。程子曰。古之學者為己。其終至於成物。今之學者為人。其終至於喪己。蓋亦微見聖人本意也耳。

君子思不出其位

此雖曾子重述夫子之言。以兼舉艮大象之語。然其

義各殊。朱傳所引程范均未道及焉。蓋不在其位。不謀其政。不過盡已之職。無越思耳。若夫思不出其位。則有二義焉。蓋位者職也。一為不越職。一為盡其職。不越職猶易。盡其職甚難。譬之侍郎不思尚書之職。尚書不思大學士之職。易也。然平心自問。果各能盡其職哉。冢宰掌邦治。統百官。均四海。皆其位中之事。司徒掌邦教。敷五典。擾兆民。皆其位中之事。果皆盡職乎。為人君者。協和萬邦。闢門明目。實皆予位中之事也。不能身體力行。兢業惶恐之。不暇尚何敢有出

其位之思哉。且出其位亦更何之乎。然而今實有四年後歸政之期。則亦所謂過望之思。出其位矣。然在耄期倦勤者或宜。餘不可也。

不逆詐不億不信。抑亦先覺者是賢乎。

此語宜與誠明相參看。蓋不逆詐不億不信是誠也。抑亦先覺是明也。人情變幻莫齊。而可以齊之者莫如誠。使事事皆逆其詐而億其不信。是已先以不誠待人。人亦將以逆者億者應之。此亦一不誠也。彼亦一不誠也。蓐擾虛偽莫可究詰。雖云渥其泥而揚其

波而已已處污濁之內欲其先覺抑亦難矣若夫誠以待人譬之鏡清衡平初不以妍媸輕重示物而物之照者懸者妍媸輕重自呈於當前而無纖毫之可隱焉明何如之賢何如之雖然誠明性也豈易言哉易曰閑邪存其誠斯則人人所宜自勉乎

子曰性相近也習相遠也

子貢之贊孔子曰夫子之文章可得而聞也夫子之言性與天道不可得而聞也若是乎夫子之言性誠不可得而聞乎哉乃夫子之言性則曰性相近也習

相遠也。以性對習。而近之與遠。亦不過百步五十步之分耳。何其視性之卑耶。蓋嘗讀中庸而知其說矣。天命之謂性。性相近也。率性之謂道。修道之謂教。習相遠也。此猶未指夫知誘物化之私而言。而其視性之近乎天命。為已遠矣。故易曰。成性存存。道義之門。此修道率性之謂也。詩曰。穆穆文王。純亦不已。此即性即天命之謂也。而程子動箴亦曰。習與性成。聖賢同歸。誠能遏人心。即所以存道心。不遠復。无祇悔。又何遠近之殊耶。



四時行焉百物生焉

斯言也。蓋孔子知命耳。順以後。所以示學者真實至當之理。非因子貢以言語觀聖人。徒為是不待言而可見之語。而別有所謂妙道精義也。且四時行百物生之中。何一非天乎。而四時行百物生之外。又何別有可以見天者乎。聖人視聽言動。晝作夜息之中。何一非妙道精義乎。而聖人視聽言動。晝作夜息之外。又何別有所謂妙道精義者乎。天即聖人。聖人即天。四時行。百物生。即聖人之視聽言動。晝作夜息。吾故

曰。此孔子知命耳。順以後。所以示學者真實至當之理。非因子貢以言語觀聖人。徒為是不待言而可見之語。而別有所謂妙道精義也。士希賢。賢希聖。聖希天。學者由躬行實踐。深造而自得之可矣。

博學而篤志。切問而近思。仁在其中矣。

此非四事。蓋兩事耳。博學而不篤志。則或涉為荒唐。切問而不近思。則或入於無稽。然志也。思也。一心之事耳。仁。人心也。安見篤志近思。而心常馳騁於外者哉。故曰。仁在其中。朱注以為未及乎力行而為仁。此

或為下學者言夫篤志近思而不力行則又安得謂之篤志近思乎子夏雖文學之科此言實見道之論故博學切問仍文學之事歟而篤志近思則心存矣心存而仁存是知學問思辨智之事而智亦仁之事不然元何以貫四端而長萬善哉

寬則得衆信則民任焉敏則有功公則說

夫子歷論堯舜禹湯武王授受之旨而統之曰寬則得衆信則民任焉敏則有功公則說寬信敏公乃聖王治世之大本而必以寬居首者蓋寬者仁之用仁

者元之德。元者善之長。故惟寬然後能兼容。並育而羣生之衆。有所託命焉。左傳記夫子之言曰。寬以濟猛。猛以濟寬。政是以和。蓋因一時為鄭而發。此補偏救弊之說。若夫聖王出治。舍寬其何以為敷政寧人之本哉。

因民之所利而利之

天子以四海為家。則四海之民皆吾一家之赤子也。保赤之心既切。因利之政當求。制田里。教樹畜。使之知節儉。務耕桑。因五方之財。阜萬民之產。斯所謂不

費之惠耳。博施濟衆。堯舜猶病。蓋孔子訓子貢。以為仁之方。非謂不捐已財以與人也。且天子何得有已財乎。不違因利之旨。將謂府庫為天子之財。且捐此財以與人。則謂之費。見何小哉。夫四民之所以自謀其生理。亦已勤矣。農耕於野。工商勤於市。士雖不逐逐。然其所以為仰事俯育之資者。亦必有謀焉。使為政者人人而為之圖。給之求。則弊精勞神。且有所不能徧及。此所謂費也。此所謂不能成其惠也。不啻此也。即因利之言。亦當有所權宜於其間。而不可以冒。

昧行之。今夫墾闢豈非勸農之舉。而一有不實。將致  
勸民承種以納糧。重為民累者矣。積儲豈非有備之  
圖。而行之過甚。將致踊貴於市而艱糴。饔飧莫給者  
矣。其他可以類推者。不可勝舉。故孔子因民之利之  
言。所包括者甚廣。而不可徒於不費求之。則思過半  
矣。

讀孟子滕文公章句下

陳代欲畝小節以見諸侯。而舉枉尺直尋之喻。孟子  
闢之是也。然所稱王良之事。余不能無溫公之疑焉。

獵與戰。其不可以車行。余旣於詠御之詩論之矣。北人言舟。南人言馬。必不能得其款要。章章甚明。馳射之事。自應屬北方。射生手。今即使北方射生善手。操弓挾矢。立之車中。將見顛簸支屈。不能命中。吾恐其皆為嬖奚之終日。而不獲一禽。而謂南方之人能之乎。且馳之者在御。而射之者在人。御者即範其馳驅。而射者不中。御者亦無如之何也。御者範馳驅而射者。即屢中。無是理也。且羿與由基。世所謂善射者也。使王良範馳驅。以御。皆一朝而獲十焉。亦得謂之君

子乎。或曰。古者禽獸多而疆界平。故可以車獵。何言之甚哉。且恨御之道不傳。而世無王良也。若然。今之南苑。即所謂禽獸多而疆界平。吾將試之。其不可行立見矣。嗚呼。是果無王良乎。是果無王良其事乎。

舜明於庶物。察於人倫。由仁義行。非行仁義也。

明以識事物之理。察以盡人倫之詳。察雖若精於明。然事物原不出人倫之外也。處人倫之間。而能盡仁義之詳者。莫過於舜。故孟子曰。由仁義行。非行仁義也。蓋由仁義行。則仁義與己為一。行仁義。則己與仁



義為二仁者安仁無所勉強而所行無非仁能仁而安有不能義者乎知者利仁則是知其為利而行之者其視從容中道由仁義而行渾然無間不待用力者則有別矣易曰同歸而殊塗一致而百慮不察於人倫之間而盡仁義之詳者烏足與言內聖外王之道也耶

由仁義行非行仁義也

人者仁也行而宜之之謂義人之所以異於禽獸者以有仁義而已矣而人之所以存仁義安而行之無

所勉強。惟聖人然後能之。聖而至於舜。繼帝堯而傳心法。可謂為天地立心。為生民立命矣。孟子稱其明庶物而察人倫。為由仁義行。非行仁義。其視勉強行仁義者。固不同矣。然舜之明察。豈外仁義而為之哉。諧孝即肫然之仁也。烝乂即秩然之義也。所為安而行之。無所勉強。余以為由仁義行。猶孟子求其說而不得。從而為之辭者。

書孟子對萬章焚廩浚井事

辯聖人之事。而不折衷於理。雖有懸河之口。炙轂之

智徒資踳駁而無當於事如舜之焚廩浚井是矣夫  
此事始於萬章而成之於司馬遷遂令後世咸以為  
必有而予則以為必無亦惟折衷於理而已夫舜大  
孝者也。烝烝乂不格姦。是瞽叟與象亦有所回心矣。  
於是帝妻以二女。百官牛羊倉廩備。則是時叟與象  
亦不能使之完廩浚井矣。且捍笠而下匿空而出。是  
舜預有所防矣。有所防非孝子之心也。申生且弗為。  
而謂舜為之乎。使叟象果有其事。舜亦惟叩首泣血  
求之於叟而已。求而弗得。舜亦必不為申生之勇於

從而順命。將陷父於不慈。所謂小杖則受。大杖則走。舜亦必有以處此矣。孟子之對咸邱蒙。不曰齊東野人之語乎。然則萬章之問。亦當以齊東野人之語折之。而不答。何必費辭。後世若劉知幾。蘇轍。羅泌。雖皆見及此。而未嘗折衷於理。以謂必無其事。且費辭。予故詳敘而簡論之。

天與賢則與賢。天與子則與子。

天與賢則與賢。天與子則與子。斯二語也。以為答萬章之前問。從而為之辭。則可以為示後之繼業。為萬

世法則則不可蓋自啓賢繼業之後但有與子無與賢之事矣其有託與賢而攘竊者皆亂臣賊子之流非唐虞之所謂禪也且

天何言哉與賢與子將命者誰以予論之天視自我民視天聽自我民聽民之所與即天之所與然與子雖為萬世不易之規而其敗德隳行恃天之與已而不  
知凜難堪靡常之義存如保赤子之懷則民必不與之而天亦厭之而不與斯不大可畏乎紂之言曰我  
生不有命在天此豈非恃天之與已乎吾是以祇申

難。謚。靡。常。之。義。而。戒。負。宸。者。慄。慄。畏。懼。以。敬。天。愛。民。  
慎。守。其。器。而。前。此。之。與。子。與。賢。胥。不。必。論。後。此。之。與。  
子。與。賢。胥。不。可。恃。故。曰。斯。二。言。不。足。以。示。後。之。繼。業。  
為。萬。世。法。則。也。至。於。較。年。之。多。少。及。地。之。遠。近。所。為。  
愈。去。愈。遠。而。更。甚。之。乃。曰。故。仲。尼。不。有。天。下。余。又。以。  
為。斯。言。也。仲。尼。必。不。為。之。仲。尼。而。為。斯。言。亦。非。仲。尼。  
而。已。矣。蓋。孟。子。歎。王。道。之。不。行。萬。民。之。受。害。未。嘗。無。  
已。欲。得。天。下。以。施。號。令。行。王。道。之。意。然。而。仲。尼。無。此。  
心。也。人。非。孟。子。更。不。可。有。此。心。也。嗚。呼。此。孔。子。所。以。

為至聖而孟子祇可稱其亞者乎

聖人治天下使有菽粟如水火菽粟如水火而民焉有不仁者乎

民為邦本食乃民天菽粟如水火斯民敦禮讓之習戶有盈寧之象仁風於是乎興矣然菽粟全賴天時而天時則不可保其必然聖人之使有菽粟如水火亦惟盡人事以贊天功耳恐無所出也教民耕種恐無所餘也教民積貯凡所為食之以時用之以禮者何一非使菽粟如水火之道哉今天下幅帙日廣生

齒日繁。一有水旱饑荒立告。此皆不能使菽粟如水  
火之故也。吾君臣宜共留意焉。